

Prome Minister Eman:

Ta scucha consehonan di CFT pero Gobierno ta dicidi na final kico ta haci pa cumpli cu normanan di presupuesto

ORANEJSTAD – Na su yegada for di Corsou unda el a participa den Conferencia di Reino, Prome Minister Mike Eman a papia palabra cla riba e rol di CFT na Aruba.

El a lamenta cu for di cierto areanan politico ta duna un mal interpretacion na e trabou di e comision aki. CFT tin un tarea pa duna conseho na Aruba di con logra yega na e meta di un presupuesto balansa. E ta keda esey, un conseho. Na final con Aruba ta yega na su meta ta Aruba mes ta dicidi, e mandatario a expresa.

Siman pasa CFT a entrega un rapport den cual ta conseha pa subi e BAZV cu mey porciento mas pa yega na un total di 4%. Prome Minister a splica cu ta masha importante pa pueblo ta na altura di e rol cu CFT a bin ta hungando.

Nan tin cu supervisa e normanan den cual Gobierno a acorda pa su mes wordo alcansa. Si no logra e normanan ey, CFT por duna un indicacion na Gobierno di Reino y Aruba lo por haya su mes den un situacion cu a pasa aden caba. Pues nan ta controla e normanan cu Aruba mes ta bay poniendo su dilanti. E otro rol cu e instituto aki tin ta pa duna conseho. “Hopi biaha esaki ta wordo confundi na momento cu e consehonan aki wordo publica comosifuera cu tur e consehonan aki mester wordo aplica. CFT ta wak e presupuesto y ta bisa bo mester yega na 3.7, nan ta haci un calculacion di e entrada y gastonan, y ta duna consehonan bisando cu lo ta bon pa subi cierto tipo di impuesto of baha cierto gastonan.

Nan tin pleno derecho pa haci sugerencianan.” El a splica cu ta masha importante si pa realisa cu na final di cuenta ta

Gobierno ta haci e escogencianan di maneho. E mandatario a pone hopi enfasis cu su Gobierno ta habri pa ricibi tur conseho, manera di IMF, di Fitch, Banco Central, pero gobierno ta esun cu ta haci calculacionnan “kico ta miho pa economia di Aruba, kico e economia por carga y kico e ciudadanonan por carga y kico ta haci un impacto mas faborabel pa entrada di Gobierno y na mesun momento ta haci menos impacto riba e poder di compra di nos ciudadanonan.”

Prome Minister Eman a splica tambe cu e maneho menciona di su Gobierno a haci cu na momento cu a aumenta e BAZV cu un porciento, a dicidi di reduci e prima di AZV cu un porciento (cu ta bayendo Parlamento). E ta nifica un tiki mas placa den cartera di e ciudadano. E carga di cualkier aumento di e prima di BAZV ta bira mas cargabel, pues buscando socialmente un forma mas husto. “E linea di pensamiento aki ta hancra den e linea di pensamiento di nos Gobierno,” Eman a bisa.

CFT por haci recomendacionnan, pero finalmente loke Aruba ta wordo midi na dje ta cu Aruba a logra e normanan poni riba presupuestoonan di awo te cu 2017. “Tur lo demas ta consehonan cu ta mara Aruba ta e normanan y no e consehonan. Den e sentido ey nos ta desea pa den e periodo cu ta bini pa e forma con oposicion trece e informacion por cambia un tiki ya cu tin biaha nan ta trece confusion creando inseguridad innecesario. Gobierno cada bes ta hopi cla riba e pasonan cu tin cu tuma, ta scucha tur conseho, pero gobierno ta conseho y mester cumpli cu e normanan, considerando interes general di pais Aruba.

Den cuadro di e aumento di BAZV, Gobierno tabatin combersacion cu SER (Social Economische Raad) pa logra yega na un aumento di salario minimo. Ta spera di por ricibi mas pronto posibel un noticia positivo cu e salario minimo por wordo aumenta. Si tur cos bay bon, gobierno ta desea pa esaki drenta na vigor na luna di augustus, pa compensa cualkier efecto di BAZV tin pa esun cu entrada di 2500 florin of menos. □

